

大清會典

六十一



內閣文庫	漢書類
一八九九	冊號
二架	函號

內閣文庫	漢書類
一八九九	冊號
二架	函號

內閣文庫	番號	漢	1899
冊數	141	(61)
函號	295		1




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM Kodak





大清會典

大清會典卷之六十七

禮部二十

喪禮一

淺草文庫

喪葬之禮。達於上下。其間差等不一。各有定制。自大喪儀而下。漸次詳列。至宗室外藩。品官卹典。亦附載焉。

大喪儀

太宗文皇帝大喪儀

崇德八年八月初九日。

大行皇帝崩。是日鹵簿全設。內外親王以下。佐領以上。朝鮮國世子。及和碩妃以下。佐領命婦以上。俱

成服○王以下。奉國將軍以上。公主和碩妃以下。縣君奉國將軍淑人以上。齊集

清寧宮前詣

大行皇帝几筵。上香。跪。獻酒三爵。興。舉哀。都統尚書以下官員。齊集

崇政殿前。命婦等。齊集

大清門外。各按旗排立舉哀○次日。奉移

大行皇帝梓宮。作樂。奉安

崇政殿。設几筵。樂止。王以下各官。每日入臨二次。上香。供饌。獻酒三爵。三叩頭。興。舉哀。凡三日止

○第四日。諸王貝勒貝子公及妃等。各回府齋宿。部院官員。各在衙門齋宿。閑散官員。在篤恭殿前齋宿。凡十八日止。各回○諸王以下各官。不祈禱。不報祭。不筵宴。凡百日止。庶民人等。凡十八日止。禁屠宰。凡十三日止。其外省官民人等。以

詔到日。摘冠纓成服。各官於本衙門齊集。每晨夕上香。三跪九叩頭。興。舉哀。凡三日止。至二十七日除服○一行初祭禮。王以下。佐領以上。固倫公主和碩妃以下。佐領命婦以上。齊集致祭○

一行大祭禮。鹵簿全設。讀文致祭。王以下各官。公主王妃及官員命婦。齊集行禮。與初祭同。○一行滿月致祭禮。王以下各官。公主王妃及官員命婦。齊集行禮。與初祭同。○九月。恭奉

大行皇帝梓宮詣

昭陵。先於

梓宮前告祭。奠酒三爵。鹵簿全設。作樂前行。公主王妃等。俱在城門迤北。排候

梓宮至。跪。舉哀。候過。隨行。都統尚書以下。佐領以上。及佐領命婦以上。并外藩喀爾喀鄂爾多斯土

默特索倫薩哈爾察等。分翼按旗排立。候

梓宮至。跪。舉哀。候過。隨行。送至

陵上。俟安設畢。行安神禮。讀文致祭。是日親王以下。佐領以上。和碩妃以下。佐領命婦以上。俱除服

○一

皇后等除服。行致祭禮。親王以下。佐領以上。固倫公主和碩妃以下。副都統命婦以上。齊集。讀文行禮。○一朝鮮國王。遣官進表。呈送龍燭祭品等物致祭。○一行常祭禮。內大臣侍衛前往行禮。○一行百日致祭禮。親王以下。叅領以上。固倫

公主和碩妃以下副都統命婦以上齊集致祭
行禮○一行歲暮致祭禮。鹵簿全設。親王以下
佐領以上。固倫公主和碩妃以下。固山夫人以
上。齊集致祭行禮○一行清明致祭禮。鹵簿全
設。親王以下。叅領以上。固倫公主和碩妃以下。
縣主以上。齊集致祭行禮○一行暮年致祭禮。
親王以下。佐領以上。固倫公主和碩妃以下。奉
國將軍淑人都統尚書命婦以上。齊集。讀文致
祭行禮。是日奉移。

梓宮昇化○一行揀殮禮。親王以下。佐領以上。固倫
公主和碩妃以下。縣主奉國將軍淑人都統尚
書命婦以上。於殿堦西旁齊集。

皇后公主等詣昇化處舉哀。恭行揀殮。奉安

神案上。

皇后跪奠酒三爵。內大臣輔國將軍捧

寶位。由中堦陞至殿內。奉安正中位上。舉哀畢。隨將
寶位週圍蓋砌。恭獻祭品。奠酒行禮畢。俱退○康熙

二年九月。改造

昭陵地宮。十二月安葬

詳載
陵寢

世祖章皇帝大喪儀

順治十八年正月初七日。

大行皇帝崩。是日鹵簿大駕全設。王以下文武各官。固倫公主和碩妃以下。宗女佐領三等侍衛命婦以上。俱成服。官員摘冠纓。婦女去首飾。○王貝勒貝子公大臣等。公主和碩妃以下。縣君宗室公夫人以上。每日二次詣

大行皇帝几筵前。上香。供饌。跪奠酒三爵。三叩頭。立舉哀。副都統以下。在

乾清門外排立。每日二次舉哀。命婦俱免齊集。在京漢文官。赴

景運門外齊集。武官赴

隆宗門外齊集。每日二次舉哀。凡三日止。外藩進貢官員。各給白布服。三日而除。漢文武候選候補等官。及監生吏典僧道官。俱縞素赴順天府衙門。朝夕舉哀。凡三日止。○第四日。王貝勒貝子公等。公主王妃等。各歸本府齋宿。部院官員。於各衙門齋宿。閑散官員。於

午門外齋宿。共二十七日。○二七日後。王以下。奉恩將軍以上。都統內大臣尚書精奇尼哈番以上。每日一次。入宮前丹陛上排立。副都統阿思

會典卷六十一
五
哈尼哈番侍郎侍衛。每日一次。入宮前丹墀下
排立。於

梓宮前。上香。供饌。跪奠酒三爵。三叩頭。立舉哀。其餘
各官。在

乾清門外。照翼排立。舉哀。○王以下。文武官員。不
作樂。不嫁娶。凡百日。在京軍民人等。摘冠纓。服
縞素。二十七日而除。不嫁娶。凡一月。不作樂。凡
百日。禁屠宰。凡四十九日。不祈禱。不報祭。凡二
十七日。○未除服前。票本用藍筆。各部院衙門
文移。用藍印。各衙門本章。於十五日之後進奏。

用硃印。○在京各寺觀。自

大喪日始。各聲鐘三萬杵。○初八日。頒
遺詔。自宮內捧出。至

乾清門外。禮部堂官跪接。由中道捧至

午門外。奉安層臺上。張黃蓋。滿漢文武各官。素服。
三跪九叩頭。復跪聽宣

詔畢。立舉哀。又三跪九叩頭。禮部官捧
詔。置龍亭內。由中道出

大清門。至禮部。遣官頒行天下。○初九日。

上卽皇帝位。諭禮部。恭上

皇考大行皇帝尊謚○外省領兵王公大臣各官。

遺詔到日。俱摘冠纓。服縞素。跪候進至衙門內安設。三跪九叩頭。聽宣。

詔畢。立舉哀。又三跪九叩頭。興。官兵摘冠纓三日。至第四日。照常供事○直省文武各官。

詔到日。俱摘冠纓。服縞素。跪候進。至衙門內安設。三跪九叩頭。聽宣。

詔畢。立舉哀。又三跪九叩頭。朝夕哭臨三日。至二十七日。除服。官員命婦亦服素服。二十七日而除。軍民人等及妻。服素服十三日而除。不嫁娶。

凡一月。不作樂。凡百日。督撫提鎮及三司官。俱免進香○十九日。

梓宮前行常祭禮。是日黎明。王以下滿漢文武各官。縣君奉恩將軍淑人以下。民公侯伯都統內大臣尚書精奇尼哈番命婦以上。齊集。讀祭文時。衆皆跪。讀畢。奠酒三爵。立舉哀。祭畢。讀祭文官。捧至燎位。奠酒三爵。焚畢。衆皆退○二月初一日。行奉移。

梓宮致祭禮。其讀文奠酒行禮。與常祭同○初二日。奉移。

梓宮至景山

壽皇殿。是日鹵簿大駕全設。奉移時奠酒三爵。經過門橋俱奠酒。王以下。奉恩將軍以上。內大臣侍衛在。

乾清門外。照翼排立。候。

梓宮至。跪。舉哀。候過。隨行。覺羅民公侯伯以下。滿漢文武各官在。

東華門外。照翼齊集。候。

梓宮至。跪。舉哀。候過。各按旗排列隨行。將至景山時。王以下。阿思哈尼哈番以上。先趨進殿門內。其

餘文武各官。先趨至門外。照翼排立。公主王妃以下。縣君奉恩將軍淑人以上。都統內大臣尚書精奇尼哈番等命婦。在殿門內。副都統侍郎命婦以下。佐領三等侍衛命婦宗室女以上。在門外。照翼排立。候。

梓宮至。俱跪。舉哀。候過。俟。

梓宮奉安殿上畢。奠酒三爵。衆皆散。

每一奠酒。一叩頭。後同。

○

初三日。行初祭禮。鹵簿大駕全設於

壽皇殿前。王以下各官。公主王妃以下。四品官三等侍衛命婦以上。齊集。讀祭文。衆皆跪。讀畢。奠

酒三爵。衆皆三叩頭。立。舉哀。祭畢。讀祭文。官捧至燎位。奠酒三爵。焚畢。衆皆退。是日滿二十七日。衆皆除服。○次日常祭。止內大臣侍衛禮部工部官員。齊集致祭。○初七日。行滿月致祭禮。王以下。鎮國將軍以上。民公侯伯以下。侍衛文武三品官以上。公主王妃以下。鎮國將軍夫人。都統內大臣尚書精奇尼哈番命婦以上。齊集奠酒。行禮致祭。○以後百日內。滿月致祭。與初滿月同。期年內。滿月致祭。清明致祭。無祭文。其奠酒行禮齊集。與初滿月同。○三月。恭上

大行皇帝尊謚曰

體天隆運英睿欽文大德弘功至仁純孝章皇帝。廟號世祖。

上率諸王文武各官詣

梓宮前。奉安冊寶。供菓品。上香燭。獻爵。讀祝文。致祭

行禮

儀注
另載

○四月十七日。行百日致祭禮。王以

下。奉國將軍及各官。公主和碩妃以下。縣君奉國將軍淑人。都統內大臣尚書精奇尼哈番命婦以上。齊集。讀文。奠酒行禮。祭畢。奉移

梓宮。奠酒三爵。衆皆跪候。

梓宮過。隨行。至昇化處。排立。奠酒三爵。○是日。內閣

大學士一員。進

觀德殿內。於入

太廟神位前。上香。一跪三叩頭。恭捧

神位。禮部官導至

壽皇殿門外。所設黃幄內。奉安黃案上。上香。一跪

三叩頭。俟奉移

梓宮時。內閣滿漢大學士各一員。俱朝服盥手。詣

神位香案前。一跪三叩頭。於神字空點處。用石青填

題畢。復一跪三叩頭。奉安黃幄內。候

梓宮昇化。王以下文武各官。赴

東華門外。照翼齊集。大學士詣

神位香案前。一跪三叩頭。捧安綵輿內。復一跪三叩

頭。儀仗全列。校尉昇輿前行。內大臣侍衛隨後。

至

觀德殿前。輿暫止。大學士一員。進殿內。於入

奉先殿神位前。一跪三叩頭。恭捧

神位安輿內。復一跪三叩頭。校尉昇起。禮部官前導。

隨入

太廟神位輿後。由景山東門出。將至

東華門齊集。王以下文武各官俱跪候過。輿進

東華門後各退。內大臣侍衛等隨至

景運門退。內閣禮部官隨輿由

協和門外至

景運門。

上素服奉迎於

景運門內。隨輿後行。內府官員前導。至

乾清宮輿止。

上先詣入

太廟神位輿前行一跪三叩頭禮。恭捧

神位奉安

乾清宮所設黃案上行一跪三叩頭禮。輿又於入

奉先殿神位輿前行一跪三叩頭禮。恭捧

神位奉安入

太廟神位之右。行一跪三叩頭禮。輿次行安神禮。內府

官供菓品。上香燭。獻酒三爵。

上行三跪九叩頭禮。嗣後每日上香燭。俟欽天監擇

吉。奉入

太廟

奉先殿

儀注另載

○四月二十一日。行揀殮致祭禮。王以下

各官。公主王妃至大臣命婦。齊集。讀文奠酒。行禮。與百日致祭同。○奉安

寶位。行致祭禮。與揀殮禮同。○百日後滿月致祭。止。內大臣侍衛。禮部工部堂官。齊集行禮。○建造享殿

地宮。選精識地理人等。內院禮部工部都察院科道官員。率往會擬。○朝鮮國王遣官進香致祭。王以下。奉國將軍文武三品官侍衛以上。齊集。陳設祭品。鳴贊官贊來使行禮。讀文致祭。捧祭文送焚畢。衆皆散。○五月初三日。行大祭禮。與初

祭禮同。○次日常祭。王以下。公以上。民公侯伯以下。都統尚書精奇尼哈番以上。齊集致祭。與前常祭同。○七月十五日。行秋季致祭禮。儀仗全設。王以下。公以上。民公以下。文武三品官以上。內大臣都統尚書精奇尼哈番命婦以上。齊集。讀文奠酒。行禮致祭。祭畢。讀祭文官捧送焚畢。衆皆散。○十二月。行除夕致祭禮。王以下。奉恩將軍文武四品官以上。公主和碩妃以下。縣君固山夫人以上。齊集。讀文奠酒。行禮致祭。祭畢。讀祭文官捧送焚畢。衆皆散。○康熙元年正

月。行期年致祭禮。儀仗全設。王以下。奉恩將軍。文武四品官以上。公主和碩妃以下。縣君鎮國將軍夫人。都統內大臣尚書精奇尼哈番命婦以上。齊集。讀文奠酒。行禮致祭。祭畢。讀祭文官。捧送焚畢。衆皆散。是日。

皇后及妃等俱除服。○七月十五日。行秋季致祭禮。○十二月。行除夕致祭禮。○二年正月。行再期致祭禮。與期年致祭同。○五月。恭奉

世祖章皇帝神位。移送

孝陵。前期三日。遣官各一員。告祭

天地

太廟

社稷。如常儀。前期一日致祭。儀仗全設。王以下。鎮國將軍內大臣侍衛都統尚書精奇尼哈番以上。齊集。讀文奠酒。行禮致祭。祭畢。讀祭文官捧送焚畢。衆皆散。○是日早。儀仗全設。公主王妃以下。縣君奉恩將軍恭人副都統侍郎阿思哈尼哈番命婦以上。在

壽皇殿前。分翼齊集。侍衛文武四品官以上命婦。在景山東門外齊集。王以下。奉恩將軍以上。內

大臣侍衛在

壽皇殿門外。分翼齊集。香冊香寶。先置輿內。恭捧神位。奠酒三爵。奉安輿內。

靈輿在前。冊寶輿在後。

靈輿經過時。各跪舉哀。候過。諸王大臣侍衛隨後。依次排行。其不往送公侯伯以下。滿漢文武各官。於東安門外齊集。候

靈輿將至。俱跪舉哀。候過。隨後行。出土城關方回。其往送公侯伯以下。滿漢文武各官。於土城關外。大路兩旁排立。候

靈輿將至。俱跪舉哀。候過。隨後行。經過門橋。俱奠酒。○凡至宿次。奉安

靈輿於圓幄內。每夕供獻。親王奠酒三爵。每晨奉安靈輿於涼棚內。親王奠酒三爵。其朝夕奠獻時。諸王貝勒內大臣侍衛等。進木城內。各官在木城外。俱排立舉哀。沿途百里內地方文武官。俱素服。在道右跪送。舉哀。候過。至

陵日供獻。與在途同。次日。王以下各官齊集。供獻奠酒。一跪三叩頭。立舉哀。徹供物畢。各散。是日。王以下各官俱回京。○六月。行奉安

地宮禮前期遣輔臣及文武三品以上官詣
陵讀文奠酒行禮致祭○前期三日遣官告祭

天地

太廟

社稷是日早鹵簿大駕全設禮部堂官掌儀司官奉
世祖章皇帝

孝康皇后

端敬皇后香冊香寶捧置各輿內送至地宮奉安輔臣
一員詣

神位前跪行奉移禮奠酒三爵

世祖章皇帝神位輔臣二員內大臣一員捧安輿內

孝康皇后神位親族大臣等捧安輿內

端敬皇后神位親族大臣等捧安輿內移送地宮時內

大臣侍衛在木城外公侯伯以下叅領阿達哈

哈番以上在網城外照翼排立候

神位至俱跪舉哀候過隨後舉哀行至地宮輔臣內

大臣侍衛公侯伯以下副都統侍郎阿思哈尼

哈番以上在地宮圓城內排立叅領阿達哈哈

番等官在圓城外享殿後兩旁排立舉哀至吉

時恭奉

世祖章皇帝神位。捧至地宮。安設正中石床上。

孝康皇后神位。捧至地宮。安設左石床上。

端敬皇后神位。捧至地宮。安設右石床上。畢。將地宮石

門掩閉。輔臣在地宮前跪。奠酒三爵。內大臣侍

衛文武各官。俱立舉哀。各退。是日儀仗俱焚訖

○次日。輔臣率內大臣侍衛文武各官。詣

陵謁辭。俱進地宮圓城內排立。舉哀畢。輔臣等跪於

陵前。奠酒三爵。文武各官俱三跪九叩頭。兩旁排立。

舉哀畢。各退。回京

享殿告成。奉安

世祖章皇帝神位。於寶座上。正中南向。

孝康皇后神位。於寶座上。左設南向。

端敬皇后神位。於寶座上。右設南向。讀祝致祭。

大清會典卷之六十七




Table with multiple columns and rows, containing faint text and a large dark smudge.

